

四庫全書

子部

欽定四庫全書

子部  
肘後備急方卷八

詳校官太醫院醫士<sub>臣</sub>舒岱

編修<sub>臣</sub>倉聖脉覆勘

總校官進士<sub>臣</sub>朱 鈐

校對官助教<sub>臣</sub>蔡 鎮

謄錄監生<sub>臣</sub>王 鐸

欽定四庫全書

肘後備急方卷七

晉 葛洪 撰

治為熊虎爪牙所傷毒痛方第五十

葛氏方燒青布以燻瘡口毒即出仍煮葛根令濃以洗瘡  
擣乾葛根末以煮葛根汁服方寸匕日五夜一則佳

又方嚼栗塗之姚同

又煮生鐵令有味以洗瘡上姚同

凡猛獸毒蟲皆受人禁氣將入山草宜先禁之其經術云

到山下先閉氣三十五息存神仙將虎來到吾前乃存吾肺中有白帝出把虎兩目塞吾下部又乃吐肺氣白通冠一山林之上於是良久又閉氣三十五息兩手捻都監目作三步步皆以右足在前乃止祝曰李耳李耳圖汝非李耳耶汝盜黃帝之犬黃帝教我問汝汝答之云何畢便行一山之虎不可得見若逢

之者目向立大張左手五指側之極勢跳手上下三  
度於跳中大喚咄虎北斗君汝去虎即走止宿亦先  
四向如此又燒牛羊角虎亦不敢近人又搗雄黃紫  
石縫囊貯而帶之

附方

梅師方治虎傷人瘡

但飲酒常令大醉當吐毛出

治卒有猘犬凡所咬毒方第五十一

療獬犬咬人方

先啣却惡血灸瘡中十壯明日以去日灸一壯滿百乃止姚云忌酒

又云地榆根末服方寸七日一二亦末傳瘡上生根搗傳佳

又方刮虎牙若虎骨服一匕已發如獬犬者服此藥即差姚同

又方仍殺所咬犬取腦傳之後不復發

又方搗薤汁傅之又飲一升日三瘡乃差

又方末礬石內瘡中裹之止瘡不壞速愈神妙

又方頭髮蝟皮燒末水和飲一杯若或已目赤口噤者  
折齒下之姚云二物等分

又方搗地黃汁飲之并以塗瘡過百度止

又方末乾薑常服并以內瘡中

凡獬犬咬人七日一發過三七日不發則脫也要過百  
日乃為大免耳

每到七日輒當飲薤汁三二升又當終身禁食犬肉  
蠶蛹食此發則不可救矣瘡未差之間亦忌生物諸  
肥膩及冷但於飯下蒸魚及就膩氣中食便發不宜  
飲酒能過一年乃佳

若重發療方

生食蟾蜍鱸絕良驗姚同亦可燒炙食之不必令其  
人知初得嚙便為之則後不發姚剝作鱸吞蒜蘘下  
又方搗薑根汁飲之即差



又方服蔓菁汁亦佳

又凡犬咬人

取竈中熱灰以粉瘡傳之姚同

又方火炙蠟以灌瘡中姚同

又方以頭垢少少內瘡中以熱牛屎塗之佳姚同

又方按蓼以傳瘡上

又方乾薑末服二匕薑汁服半升亦良

又方但依猘犬法彌佳燒蟾蜍及末礬石傳之尤佳

犬狂者難療凡犬食馬肉生狂方

及尋常忽鼻頭燥眼赤不食避人藏身皆欲發狂便  
宜枸杞汁煮糜飼之即不狂若不肯食糜以鹽伺鼻  
便急塗其鼻既舐之則欲食矣神驗

附方

梅師方治狂狗咬人

取桃白皮一握水三升煎取一升服

食療治犬傷人

杵生杏仁封之差

治卒毒及狐溺棘所毒方第五十二

馬嚼人作瘡有毒種熱疼痛方

刺雞冠血漚著瘡中三下若駁馬用雌雞草馬用雄

雞姚同

又方灸瘡及腫上差

若瘡久不差者

馬鞭梢長二寸鼠矢二七枚燒末膏和傳之效

又方以婦人月經傳上最良姚云神效

人體上先有瘡而乘馬馬汗若馬毛入瘡中或但為馬氣所蒸皆致腫痛煩熱入腹則殺人

燒馬鞭皮末以膏和傳上

又方多飲淳酒取醉即愈

又剝死馬馬骨傷人手毒攻欲死方

便取死馬腹中屎塗之即差姚同

又方以手內女人陰中即愈有胎者不可令胎墮

狐尿棘刺刺人腫痛欲死方

破雞搗之即差

又方以熱桑灰汁漬冷復易取愈

小品方以熱蠟著瘡中又烟燻之令汁出即便愈

此狐所尿之木猶如虵蛭也此下有魚骨傷人

附方

圖經云治惡刺及狐尿刺

搗取蒲公英根莖白汁塗之惟多塗立差止此方出

孫思邈千金方其序云余以正觀五年七月十五日  
夜以左手中指背觸著庭木至曉遂患痛不可忍經  
十日痛日深瘡日高大色如熟小豆色嘗聞長者之  
論有此方遂依治之手下則愈痛亦除瘡亦即差未  
十日而平復楊炎南行方亦著其效云

效方治狐尿刺螫痛

杏仁細研煮一兩沸乘熱以浸螫處數數易之

外臺祕要治剝馬被骨刺破中毒欲死

取剝馬腹中糞及馬尿洗以糞傅之大驗絞糞汁飲之效

聖惠方治馬咬人毒入心

馬齒莧湯食之差

靈苑方治馬汗入瘡腫痛漸甚宜急療之遲則毒深難理

以生烏頭末傅瘡口良久有黃水出立愈

王氏博濟治驢涎馬汗毒所傷神效

白礬飛過黃丹炒令紫色各等分相袞合調貼患處  
治卒青蛙蝎虺衆虵所螫方第五十三

葛氏竹中青蜂螫人方

雄黃麝香乾薑分等擣篩以射罔和之著小  
竹管帶之行急便用傅瘡兼衆虵虺之毒神  
良

又方破烏雞熱傅之

葛氏毒虵螫人方



蛇綠色喜綠樹及竹上大者不過四五尺昏呼為青  
條蛇中人立死急掘作坑以埋瘡處堅築其上毒入  
土中須臾痛緩乃出

徐王治蛇毒方

用搗地榆根絞取汁飲兼以漬瘡

又方搗小蒜飲汁以澤傅瘡上

又方猪耳垢著瘡中牛耳中垢亦可用之良

又方嚼鹽唾上訖灸三壯復嚼鹽唾之瘡上

又方擣薤傳之

又方燒蜈蚣末以傳瘡上

又方先以無節竹筒著瘡上鎔蠟及蜜等分灌筒中無  
蜜單蠟亦通

又方急且尿瘡中乃拔向日閉氣三步以刀掘地作小  
坎以熱湯沃坎中泥作丸如梧子大服之并以少泥  
泥之瘡上佳

又方桂心枯蓂分等為末用小竹筒密塞之以帶行卒

為蝮蛇咬即傳之此藥療諸蛇毒塞不密則氣歇不中  
用

一切蛇毒

急灸瘡三五壯則衆毒不能行

蛇毒

擣鬼針草傳上即定

又方荊葉袋貯薄瘡腫上

又方以射罔塗腫上血出乃差

又方以合口椒并葉搗傳之無不止

又方切藥刀燒赤烙之

附方

梅師方治蛇虺螫人

以獨頭蒜酸草搗絞傳所咬處

廣利方治蛇咬方

取黑豆葉剉杵傳之日三易良

廣濟方治毒蛇嚙方

菰蔣草根灰取以封之其草似鷺尾也

兵部手集主蛇蝎蜘蛛毒

雞卵輕敲一小孔合咬處立差

劉禹錫傳信方治蛇咬蝎螫

燒刀子頭令赤以白礬置刀上看成汁便熱滴咬處  
立差此極神驗得力者數十人貞元三十二年有兩  
僧流向南到鄧州俱為蛇嚙令用此法救之傳藥了  
便發更無他苦

治蛇瘡敗蛇骨刺人入口繞身諸方第五十四  
葛氏凡蛇瘡未愈禁熱食食便發療之依初螫人法  
蛇螫人九竅皆血出方

取蚩蟲初食牛馬血腹滿者二七枚燒服之

此上蛇瘡敗及洪腫法方蛇螫人牙折入肉中痛不可  
堪方

取蝦蟇肝以傳上立出

又方先密取荇葉當其上穿勿令人見以再覆瘡口上

一時著葉當上穿穿即折牙出也

蛇骨刺人毒痛方

以鐵精如大豆者以管吹瘡內姚同

又方燒死鼠搏傳之瘡上

蛇螫人瘡已合而餘毒在肉中淫淫痛痒方

取大小蒜各一升合搗熱湯淋取汁灌瘡中姚同

蛇卒繞人不解方

以熱湯淋即解亦可令就尿之

蛇入人口中不出方

艾灸蛇尾即出若無火以刀周匝割蛇尾截令皮斷  
乃將皮倒脫即出小品同之

七八月中諸蛇毒旺不得洩皆齧草木即枯死名為蛇  
蜥此物傷人甚於蛇螫即依蛇之螫法療之

附方

廣利方治蛇咬瘡

暖酒淋洗瘡上日三易



聖惠方治蛇入口并入七孔中

割母猪尾頭瀝血滴口中即出

治卒入山草禁辟衆蛇藥術方第五十五

辟衆蛇方

同前姚氏仙人入山草法

辟蛇之藥雖多唯以武都雄黃為上帶一塊石稱五兩  
於肘間則諸蛇毒莫敢犯

他人中者便磨以療之又帶五蜎黃丸良丸有蜈蚣

故方在於備急中此下有禁法去不受而行則無驗  
中虵毒勿渡水渡水則痛甚於初螫

亦當先存想作大蜈蚣在前已隨後渡若乘船渡不作  
法殺人

入山并不得呼作虵皆喚為虵中之者彌宜勿誤辟虵  
法

到處燒殺羊角令有煙出虵則去矣

附方

廣利方治諸蛇毒螫人欲死煎辟蛇

乾薑雄黃等分同研用小絹袋貯繫臂上男左女右  
蛇聞藥氣逆避人螫毒傳之

治卒蜈蚣蜘蛛所螫方第五十六

葛氏方割雞冠血塗之

又方以鹽絨瘡上即愈云蜈蚣去遠者即不復得

又方鹽熱漬之

又方嚼大蒜若小蒜或桑樹血汁塗之亦以麻履底土

搯之良

蜈蚣甚齧人其毒殊輕於蜂當時小痛而易歇蜘蛛  
毒

生鐵衣醋研取濃汁塗之又烏麻油和胡粉傳上乾  
復易取差取羊桃葉傳之立愈

附方

蚯蚓螻蛄蠱咬嚙  
尿及惡蟲咬人附

梅師方治蜈蚣咬人痛不止

獨頭蒜摩螫處痛止

又經驗後方燒雞屎酒和傳之佳又取雞屎和醋傳之  
聖惠方治蜈蚣咬方

用蝸牛擦取汁滴入咬處

兵部手集治蜘蛛咬遍身成瘡

取上好春酒飲醉使人翻不得一向卧恐酒毒腐人  
須臾蟲於肉中小如米自出

又譚氏小兒方以葱一枝去尖頭作孔將蚯蚓入葱葉  
中緊捏兩頭勿洩氣頻搖動卽化為水點咬處差

劉禹錫傳信方治蟲豸傷咬

取大藍汁一椀入雄黃麝香二物隨意著多少細研  
投藍中以點咬處若毒甚者即并細服其汁神異之  
極也昔張員外在劔南為張延賞判官忽被斑蜘蛛  
咬項上一宿咬有二道赤色細如箸繞項上從胃前  
下至心經兩宿頭面腫疼如數升盤大肚漸腫幾至  
不救張相素重薦因出家資五百千并薦家財又數  
百千募能療者忽一人應召云可治張相初甚不信

欲驗其方遂令目前合藥其人云不惜方當療人性  
命耳遂取大藍汁一甕盥取蜘蛛投之藍汁良久方  
出得汁中甚困不能動又別搗藍汁加麝香末更取  
蜘蛛投之至汁而死又更取藍汁麝香復加雄黃和  
之更取一蜘蛛投汁中隨化為水張相及諸人甚異  
之遂令點於咬處兩日內悉平愈但咬處作小瘡如  
落如舊

經驗方治蜘蛛咬遍身生絲

羊乳一升飲之貞元十年崔員外從質云目擊有人被蜘蛛咬腹大如孕婦其家弃之乞食於道有僧遇之教飲羊乳未幾日而平

又方治蚯蚓咬

濃作鹽湯浸身數徧差浙西軍將張韶為此蟲所咬其形如大風眉鬚皆落每夕蚯蚓鳴於體有僧教以此方愈

又方治蚯蚓蟲咬其形如大風眉鬚皆落



以石灰水浸身亦良

聖惠方主蚰蟥咬人方

以雞屎傳之

又方治蜈蚣咬人

用石灰醋和塗之

廣利方治蠶咬人

麝香細研蜜調塗之差

千金方治蠅虻尿瘡

棟樹枝皮燒灰和猪膏傳之

又方杵豉傳之

又方以酢和粉傳之

又方治蠹螬蟲尿人影

著處便令人體病瘡其狀如粟粒累累一聚慘痛身中忽有處燥痛如芒刺亦如刺蟲所螫後細瘡癰作叢如茱萸子狀也四畔赤中央有白膿如黍粟亦令人皮急舉身惡寒壯熱極者連起竟腰脇習也治之

法初得磨犀角塗之止

博物志治蠼螋蟲溺人影亦隨所著作瘡

以雞腸草汁傳之良

外臺秘要治蠼螋尿瘡繞身匝即死

以鷲巢中土猪脂苦酒和傳之

又方治蠼螋尿瘡

燒鹿角末以苦酒調塗之

錢相公方療蠼螋尿瘡黃水出

嚼梨葉傳之乾即易

勝金方治蠹螬尿人成瘡初如糝粟漸大如豆更大如火烙漿疱疹痛至甚宜速用草茶并蠟茶俱可以生油調傳上其痛藥至立止妙

聖惠方治惡蟲咬人

用紫草油塗之

又方以酥和鹽傳之

治卒蠱螫方第五十七

以玉壺丸及五蛄丸塗其上並得

其方在備急丸散方中

又方取屋雷下土水和傅之

治卒蜂所螫方第五十八

蜂螫人

取人尿洗之

又方穀樹桑樹白汁塗之並佳

又方刮齒垢塗之又破蜘蛛及煮蜂房塗之燒牛角灰

苦酒和塗之又斷葫楷之又嚼青蒿傳之

附方

千金方治蜂螫人

用露蜂房末猪膏和傅之楊氏產乳蜂房煎湯洗亦得

又外臺秘要按薄荷貼之差

又聖惠方以酥傅之愈

沈存中筆談云處士劉湯隱居王屋山嘗於齋中見一

大蜂竄為蛛網絲縛之為蜂所螫墜地俄頃蛛鼓腹  
欲裂徐徐行入草嚙芋梗微破以瘡就嚙處磨之良  
久腹漸消輕躁如故自後人有為蜂螫者按芋梗傳  
之則愈

治卒蠍所螫方第五十九

蠍螫人

溫湯漬之

又方按馬莧大蒜又嚼乾薑塗之佳姚方以冷水漬螫

處即不痛水微煖便痛即易水又以冷漬故布搨之  
數易

新效方蜀葵花石榴花艾心分等並五月五日午時取  
陰乾合搗和水塗之螫處立定二花未定又鬼針草  
按汁傳之立差又黃丹醋塗之又生烏頭末唾傳之  
嚼乾薑塗之又射罔封之溫酒漬之即愈

附方

孫真人食忌主蠍螫



以礬石一兩醋半升煎之投礬末於醋中浸螫處  
又勝金方烏頭末少許頭醋調傳之

又錢相公篋中方取半夏以水研塗之立止  
又食醫心鏡以醋磨附子傳之

又經驗方以驢耳垢傳之差崔給事傳

廣利方治蠍螫人痛不止方

楮樹白汁塗之立差

治中蠱毒方第六十

葛氏方療蠱毒下血方

殺羊皮方三寸得敗鼓亦好蘘荷根苦參黃連當歸  
各二兩水七升煮二升分三服一方加犀角升麻各  
二兩無蘘荷根用茜根四兩代之佳

人有養畜蠱以病人其診法

中蠱令人心腹切痛如有物嚙或吐下血不即療之  
食人五臟則死矣欲知蠱與非蠱當令病人唾水中  
沈者是浮者非小品姚並同

欲知蠱毒主姓名方

取鼓皮少少燒末飲病人病人須臾自當呼蠱主姓名可語便去則便愈亦有蛇蛭合作蠱毒著飲食中使人得瘕病此一種積年乃死療之各自有藥又藁荷葉密著病人卧席下其病人即自呼蠱主姓名也療中蠱毒吐血或下血皆如爛肝方

茜草根藁荷根各三兩呋咀以水四升煮取二升去滓適寒溫頓服即愈又自當呼蠱主姓名茜草即染

絳草也小品并姚方同也

又方巴豆一枚去心皮熬豉三粒釜底墨方寸匕合搗為三丸一丸當下毒不可者更服一丸即下

又方鹽一升淳苦酒和一服立吐即愈小品同支方苦酒一升煮令消服愈

又方取蚯蚓十四枚以苦酒三升漬之蚓死但服其汁已死者皆可活

又方苦瓠一枚水二升煮取一升服立即吐愈小品同

支方用苦酒一升煮令消服神驗

又方皁莢三挺炙去皮子酒五升漬一宿去滓分三服  
小品同

療飲中蠱毒令人腹內堅痛面目青黃淋露骨立病變  
無常方

取鐵精搗之細篩又別搗烏雞肝以和之丸如梧子  
大服三丸甚者不過十日微者即愈別有鐵精方

又方猪肝一具蜜一升共煎之令熟分為二十服祕方

小品同支方分作丸亦得

又方取棗木心剉得一斛著釜中淹之令上有三寸水  
煮取二斗澄取清微火煎得五升宿勿食旦服五合  
則吐蠱毒出小品姚同之

又方雄黃丹砂藜蘆各一兩搗末旦以井華水服一刀  
圭當下吐蠱蟲出

又方隱荳草汁飲一二升此草桔梗苗人皆食之  
治蠱已食下部肚盡腸穿者

取長股蝦蟇青背一枚雞骨支方一分燒為灰合內下部令深入小品同支方屢用大驗姚方亦同又方以猪膽漚內下部中以綿深導內塞之

又方五蠱黃丸最為療蠱之要其方在備急條中復有自然飛蠱狀如鬼氣者難治

此諸種得真犀麝香雄黃為良藥人帶此於身亦預防之

姚氏療中蠱下血如雞肝出石餘四藏悉壞唯心未毀

或鼻破

待死方

末桔梗酒服一七日一二葛氏方也

支太醫有十數傳用方

取馬兜鈴根搗末水服方寸匕隨吐則出極神驗此  
物苗似葛蔓緣柴生子似橘子

凡畏已中蠱欲服甘草汁

宜生煮服之當吐疾出若平生預服防蠱毒者宜熟



灸煮服即內消不令吐神驗

又方甘草灸每含咽汁若因食中蠱及毒即自吐出極良常含咽之永不慮藥及蠱毒也

又有解百毒散在後藥毒條中亦療方

桑白汁一合服之須臾吐利蠱出

席辯刺史傳效二方云並試用神驗

斑猫蟲四枚去足翅灸桃皮五月初五採取去黑皮陰乾大戟凡三物並搗別篩取斑猫一分桃皮大戟

各二分合和棗核大以米清飲服之訖吐出蠱一服  
不差十日更一服差此蠱洪州最多老媪解療一人  
得鱣二十疋祕方不可傳其子孫犯法黃花公若于  
則為都督因以得之流傳老媪不復得鱣席云已差  
十餘人也

又方殺羊皮方寸匕藁荷根四兩苦參黃連各二兩當  
歸犀角升麻各三兩七物以水九升煮取三升分三  
服蠱即出席云曾與一人服應時吐蜂兒數升即差

此是姚大方

附方

千金翼方療蠱毒

以槲木北陰白皮一大握長五寸以水三升煮取一升空腹分服即吐蠱出也

又治蠱毒下血

蝟皮燒末水服方寸匕當吐蠱毒

外臺秘要救急治蠱

以白鴿毛糞燒灰飲和服之

楊氏產乳療中蠱毒

生玳瑁以水磨如濃飲服一盞自解

聖惠方治小兒中蠱下血欲死

搗青藍汁頻頻服半合

治卒中溪毒方第六十一

姚氏中水毒祕方

取水萍曝乾以酒服方寸匕差止又云中水病手足

指冷即是若煖非也其冷或一寸極或竟指未過肘  
膝一寸淺至於肘膝為劇

葛氏水毒中人一名中溪一名中灑

東人呼為  
蘓駭切

一名水

病似射工而無物其診法

初得之惡寒頭微痛目注疼心中煩懊四肢振淅骨  
節皆強筋急但欲睡旦醒暮劇手逆冷三日則復生  
蟲食下瘡不痛不痒不冷人覺視之乃知不即療過  
六七日下部膿潰蟲食五藏熱極煩毒注下不禁八

九日良醫不能療覺得急當深視下部若有瘡正赤如截肉者為陽毒最急若瘡如蟲魚齒者為陰毒猶小緩要皆殺人不過二十日欲知是中水毒當作數升湯以小蒜五寸咬咀投湯中莫令大熱熱即無力捩去滓適寒溫以浴若身體發赤斑文者又無異證當以他病療之也

病中水毒方

取梅若桃葉搗絞汁三升許以少水解為飲之姚云

小兒不能飲以汁傳乳頭與之

又方常思草搗絞飲汁一二升并以綿染寸中以導下  
部日三過即差

又方搗藍青汁以少水和塗之頭面身體令匝

又方取梨葉一把熟搗以酒一杯和絞服之不過三

又方取蛇莓草根搗作末服之並以導下部亦可飲汁

一二升夏月常行欲入水浴先以少末投水中流更  
無所畏又辟射工家中雖以器貯水浴亦宜少末投

水中大佳

今東間諸山縣無不病溪毒春月皆得亦如傷寒呼為溪溫未必是射工輩亦盡患瘡痢但寒熱煩疼不解便致死耳方家用藥與傷寒溫疾相似今施其單方

五加根燒末酒若漿水飲之荊葉汁佳千金不傳秘之

又方密取蓼搗汁飲一二合又以塗身令周匝

取牛膝莖一把水酒共一杯漬絞取汁飲之日三雄



牛膝莖紫色者是也

若下部生瘡已決洞者

秫米一升鹽五升水一石煮作糜坐中即差

又方桃皮葉熟搗水漬令濃去滓著盆中坐漬之有蟲  
出

又方皁莢燒末綿裹導之亦佳又服牡丹方寸匕日三  
服

治卒中射工水弩毒方第六十二

江南有射工毒蟲一名短狐一名蜮常在山間水中人行及水浴此蟲口中橫骨角弩叩以射人形影則病其  
診法

初得或如傷寒或似中惡或口不能語或惡寒熱四肢拘急旦可暮劇困者三日齒間血出不療即死其中人有四種初覺則偏身體視之其一種正黑如墨子而繞四邊闕犯之如刺狀其一種作瘡瘡久即穿陷一種突起如石闕其一種如火灼人肉

慄起作瘡此種最急並皆殺人

居

地天大雨

或逐人行潦流入人家而射人又當養鵝鴨

則

食

人行將純白鵝以辟之白鴨亦善帶好生犀角佳也  
若見身中有此四種瘡處便急療之

急周繞徧去此瘡邊一寸輒灸一處百壯瘡亦百壯  
則愈

又方赤莧莖葉搗絞取汁飲之以滓傳之姚云服七合  
日四五服

又方葫蒜令傳以搗瘡上灸蒜上千壯差

又方白雞矢白者二枚以少錫和調以塗瘡上

又方鼠婦蟲豉各七合巴豆三枚去心合猪脂但以此藥塗之

又方取水上浮走豉母蟲一枚置口中便差云此蟲正黑如大豆浮水上相遊者

又方取皂莢一挺尺二者搥碎苦酒一升煎如飴去滓傳之痛處差

又方馬齒莧搗飲汁一升滓傳瘡上日四五徧則良驗  
又方升麻烏翬各二兩水三升煮取一升盡服之滓傳  
瘡上不差更作姚同更加犀角二兩

云此蟲含沙射人影便病欲渡水先以石投之口邊  
角弩發矢言口息兩角能屈伸

冬月則蟄

有一長角橫在口前弩擔臨其角端曲如上弩以氣  
為矢用水勢以射人人中之便不能語餘狀如葛氏

所說

治卒中沙虱毒方第六十三

山水間多有沙虱甚細略不可見人入水浴及以水澡浴此蟲在水中著人身及陰天雨行草中亦著人便鑽入皮裏其診法

初得之皮上正赤如小豆黍米粟粒以手摩赤上痛如刺三日之後令百節強疼痛寒熱赤上發瘡此蟲漸入至骨則殺人自有山澗浴畢當以布拭身數徧

以故帛拭之一度乃傅粉之也

又療沙虱毒方

以大蒜十片著熱灰中溫之令熱斷蒜及熱拄瘡上  
盡十片復以艾灸瘡上七壯則良

又方斑猫二枚熬一枚末服之燒一枚令絕烟末以傅  
瘡上即差又以射罔傳之佳

又方生麝香大蒜合擣以羊脂和著小筒子中帶之行  
今東間水無不有此浴竟中拭燂燂如芒毛針刺熟

看見則以竹葉杪挑去之

比見嶺南人初有此者即以茅葉茗茗刮去及小傷皮則為佳仍數塗苦苣菜汁佳

已深者針挑取蟲子正如疥蟲著爪上映光方見行動也若挑得便就上灸三四壯則蟲死病除

若覺猶惛惛見是其毒已深便應依土俗作方術拂出乃用諸湯藥以浴皆一二升出都盡乃止亦依此方并雜

闕

溪毒及射工法急救七日中宜差不爾



則仍有飛蟲

闕

噉人心藏便死慎不可輕

治卒服藥過劑煩悶方第六十四

服藥過劑煩悶及中毒多煩悶欲死方

刮東壁土少少以水一二升和飲之良

又方於屋雷下作坎方二尺深三尺以水七升灌坎中以物揚之令沫出取一升飲之未解更作

又方搗藍取汁服數升無藍只洗青絹取汁飲亦得服藥失度心中苦煩方

飲生葛根汁大良無生者乾葛為末水服五合亦可  
煮服之

又方吞雞子黃數枚即愈不差更作

服石藥過劑者

白鴨屎末和水調服之差

又方大黃三兩芒硝二兩生地黃汁五升煮取三升分  
三服得下便愈

若卒服藥吐不止者

飲新汲水一升即止

若藥中有巴豆下痢不止方

末乾薑黃連服方寸匕差

又方煮豆汁一升服之差

附方

外臺秘要治服藥過劑及中毒煩悶欲死

燒犀角末水服方寸匕

治卒中諸藥毒救解方第六十五

治食野葛已死方

以物開口取雞子三枚和以吞之須臾吐野葛出

又方溫猪脂一升飲之

又方取生鴨就口斷鴨頭以血瀝口中入咽則活若口不可開者取大竹筒洞節以頭注其脇取冷水竹筒中數易水須臾口開則可得下藥若人多者兩脇及臍中各與筒甚佳

又方多飲甘草汁佳

姚方中諸毒藥及野葛已死方

新小便和人尿絞取汁一升頓服入腹即活解諸毒  
無過此汁

中酖毒已死者

粉三合水三升和飲之口噤以竹管強開灌之

中射罔毒

藍汁大豆猪犬血並解之

中狼毒以藍汁解之

中狼葵毒以葵根汁解之

中藜蘆毒以雄黃葱汁並可解之

中躑躅毒以梔子汁解之

中巴豆毒

黃連小豆藿汁大豆汁並可解之

中雄黃毒以防已汁解之

中蜀椒毒中蜈蚣毒

二毒桑汁煮桑根汁並解之

中礬石毒以大豆汁解之

中芫花毒以防風甘草桂並解之

中半夏毒以生薑汁乾薑並解之

中附子烏頭毒大豆汁遠志汁並可解之

中杏仁毒以藍子汁解之

食金已死者取雞屎半升水淋得一升飲之日三服

又方吞水銀二兩即裹金出少者一兩亦足

姚云一服一兩三度服之扶坐與之令入腹即活

又方鴨血及雞子亦解之

今取一種而兼解衆毒

取甘草咬咀濃煮多飲其汁並多食葱中涕並佳

又方煮大豆令湧多飲其汁無大豆豉亦佳

又方藍青藍子亦通解諸毒常預蓄之

又方煮薺芫令濃飲一二升祕方卒無可煮嚼食之亦可作散服之此藥在諸藥中諸藥則皆驗

又方凡煮此藥汁解毒者不可熱飲之諸毒得熱更甚



宜使小冷為良

席辯刺史云嶺南俚人毒皆因食得之多不即覺漸不能食或更心中漸脹并背急悶先寒似瘴

微覺即急取一片白銀含之一宿銀變色即是藥也  
銀青是藍藥銀黃亦是茵藥久久者入眼眼或青或黃赤青是藍藥黃赤是茵藥俚人有解療者畏人得知在外預言三百牛藥或云三百兩銀藥余久任以首領親狎知其藥常用俚人不識本草乃妄言之其

方並如後也

初得俚人毒藥且令定方

生薑四兩甘草三兩炙切以水六升煮取二升且服  
三服服訖然後覓藥療之

療方

常山四兩切白鹽四錢以水一斗漬一宿以月盡日  
漬月一日五更以土釜煮勿令奴婢雞犬見煮取二  
升旦分再服服了少時即吐以銅器貯取若青色以

杖舉五尺不斷者即藥未盡二日後更一劑席辯曾  
飲酒得藥月餘始覺首領梁墳將土常山與治呼為  
一百頭牛藥服之即差差後二十日慎毒食唯有煮  
飯食之前後得差凡九人

又方黃藤十兩嶺南皆有切以水一斗煮取二升分三  
服服訖毒藥內消若防中俚人藥常服此藤縱得自  
然不發席云常服之利小便亦療數人

又方都淋藤十兩嶺南皆有土人悉知俚人呼為三百

兩銀具葉細長有三尺微藤生切以水一斗和酒二升煮取三升分三服服訖毒藥並逐小便出十日慎毒食不差更服之即愈

又方乾藍實四兩白花藤四兩出舊州者上不得取野葛同生者切以水七升酒一升煮取半空腹頓服之少悶勿怪單乾藍擣末頓服之亦差

又療腹內諸毒

都淋藤二兩長三寸並細剉酒三升合安罌中密封

以糠火燒四邊燒令三沸待冷出溫服常令有酒色  
亦無所忌大效

若不獲已食俚人食者

先取甘草一寸炙之後熟嚼吞之若食著毒藥即吐  
便是得藥依前法療之席辯云常囊貯甘草十片以  
自防

附方

勝金方治一切毒

以膽子礬為末用糯米糊丸如雞頭實大以朱砂衣  
常以朱砂養之冷水化一丸服立差

經驗方解藥毒上攻如聖散

露蜂房甘草等分用麩炒令黃色去麩為末水二椀  
煎至八分一椀令溫臨卧頓服明日取下惡物

外臺祕要治諸藥石後或熱噤多向冷地卧

又不得食諸熱麪酒等方

五加皮二兩以水四升煮取二升半候石發之時便

服未定更服

孫思邈論云有人中烏頭巴豆毒

甘草入腹即定方稱大豆解百藥毒嘗試之不效乃  
加甘草為甘豆湯其效更速

梅師方蜀椒閉口者有毒誤食之便氣欲絕或下白沫  
身體冷急煎桂汁服之多飲冷水一二升忽食飲吐  
漿煎濃豉汁服之

聖惠方治硫黃忽發氣悶用羊血服一合效

又方治射罔在諸肉中有毒及漏脯毒

用貝子末水調半錢服效或食麴臙毒亦同用

初虞世方治藥毒祕效

巴豆去皮不出油馬牙硝等分合研成膏冷水化一

彈子許服差

治食中諸毒方第六十六

蜀椒閉口者有毒戟人咽氣便欲絕又令人吐白沫多  
飲桂汁若冷水一二升及多食大蒜即便愈慎不可



飲熱殺人比見有中椒毒含蒜及薺芫差

鈎吻葉與芥相似誤食之殺人方

薺芫八兩水六升煮取三升服五合日五服又云此  
非鈎吻

食諸菜中毒發狂煩悶吐下欲死方

取雞屎燒末服方寸匕不解更服又煮葛根飲汁

葭苈毒煮甘草汁擣藍汁飲並良

苦瓠毒煮黍穰令濃飲汁數升佳

食馬肝中毒

取牡鼠屎二七枚兩頭尖者是水和飲之未解者更

作

食六畜鳥獸

幘頭垢一錢匕小品云起死人又飲豉汁數升良

凡物肝臟自不可輕噉自死者彌勿食之生食肝中毒

擣附子末服一刀圭日三服

肉有箭毒以藍汁大豆解射罔毒

食鬱肉謂在密器中經宿者及漏脯茅屋汁霑脯為漏  
脯此前並有毒

燒人屎末酒服方寸匕

又方擣薤汁服二三升各連取以少水和之

食黍米中藏脯中毒方

此是鬱脯煮大豆一沸飲汁數升即解兼解諸肉漏  
毒

食自死六畜諸肉中毒方

黃檗末服方寸匕未解者數服

六畜自死皆是遭疫有毒食之洞下亦致堅積並宜以痢丸下之

食魚中毒

濃煮橘皮飲汁小品云冬瓜汁最驗

食豬肉遇冷不消必成蟲癥下之方

大黃朴硝各一兩芒硝亦佳煮取一升盡服之若不消并皮研杏子湯三升和三服吐出神驗

食牛肉中毒煮甘草飲汁一二升

食馬肉洞下欲死者

豉二百粒杏子二十枚咬咀蒸之五升飯下熟合搗之再朝服令盡

此牛馬皆謂病死者耳

食鱸魚肝及鰕鱖魚中毒

劉蘆根煮汁飲一二升良

解毒濃煮香蘓飲汁一升

飲食不知是何毒

依前甘草薺芫通療此毒皆可以救之

食葅菜誤吞水蛭蛭噉臟血腸痛漸黃瘦者

飲牛羊熱血一二升許經一宿便煖猪脂一升飲之  
便下蛭

食菌遇毒死方

絞人屎汁飲一升即活服諸吐痢丸亦佳又掘地作  
土漿服二三升則良

誤食野芋欲死療同菌法

凡種芋三年不取亦成野芋即殺人也

附方

梅師方治飲食中毒魚肉菜等

苦參三兩以苦酒一升煎三五沸去滓服之吐出即愈或取煮犀角汁一升亦佳

又方治食狗肉不消心下堅或腹脹口乾發熱妄語煮蘆根飲之

又方杏仁一升去皮水三升煎沸去滓取汁為三服下肉為度

金匱方治食蟹中毒

紫蘓煮汁飲之三升以子汁飲之亦治凡蟹未經霜多毒

又聖惠方以生藕汁或煮乾蒜汁或冬瓜汁並佳又方治雉肉作臃食之吐下

用生犀角末方寸匕新汲水調下即差



唐崔魏公云鉉夜暴亡有梁新聞之乃諭之曰食毒僕  
曰常好食竹雞竹雞多食半夏苗必是半夏毒命生  
薑搗汁折齒而灌之活

金匱方春秋二時龍帶精入芹菜中人遇食之為病發  
時手青肚滿痛不可忍作蛟龍病服硬糖三二升日  
二度吐出如蜥蜴三二个便差

明皇雜錄云有黃門奉使交廣回周顧謂曰此人腹中  
有蛟龍上驚問黃門曰卿有疾否曰臣馳馬大庾嶺

時當大熱困且渴遂飲水覺腹中堅痞如杯周遂以硝石及雄黃煮服之立吐一物長數寸大如指視之鱗甲具投之水中俄頃長數尺復以苦酒沃之如故以器覆之明日已生一龍矣上甚訝之

治防避飲食諸毒方第六十七

雜鳥獸他物諸忌法

白羊不可雜雄雞 羊肝不可合烏梅及椒食 猪肉不可雜羊肝 牛腸不可合犬肉 雄雞肉不可

合生葱菜 雞鴨肉不可合蒜及李子鼈肉等生  
肝投地塵芥不著者不可食 暴脯不肯燥及火炙  
不動并見水而動並勿食 鳥獸自死口不開者不  
可食

水中魚物諸忌

魚頭有正白連諸脊上不可食 魚無腸膽及頭無  
魷勿食 魚不合烏雞肉食 生魚目赤不可作膾  
魚勿合小豆藿 青魚鮓不可合生胡荽 鼈目凹

者不可食 鼈肉不可合雞鴨子及赤莧菜食之

妊娠者不可食鱸魚

雜果菜諸忌

李子不可合雞子及臨水食之 五月五日不可食

生菜 病人不可食生胡芥菜 妊娠勿食桑椹并

鴨子巴豆藿羹半夏菖蒲羊肉細辛桔梗忌菜

甘草忌菰菜 牡丹忌胡荽 常山忌葱 黃連桔

梗忌猪肉 茯苓忌大醋 天門冬忌鯉魚

附方

食醫心鏡黃帝云食甜瓜竟食鹽成霍亂

孫真人食忌蒼耳合猪肉食害人又云九月勿食被霜  
瓜食之令人成反胃病

治卒飲酒大醉諸病方第六十八

大醉恐腹腸爛

作湯於大器中以漬之冷復易

大醉不可安卧常令搖動轉側又當風席地及水洗飲

水最忌於交接也

飲醉頭痛方

刮生竹皮五兩水八升煮取五升去滓然後合納雞  
子五枚攪調更煮再沸二三升服盡

飲後下痢不止

煮龍骨飲之亦可末服

連月飲酒喉咽爛舌上生瘡

搗大麻子一升末黃檗二兩以蜜為丸服之

飲酒積熱遂發黃方

雞子七枚苦酒漬之封密器中納井底二宿當取各吞二枚枚盡漸愈

大醉酒連日煩毒不堪方

蔓青菜並少米熟煮去滓冷之便飲則良

又方生葛根汁一二升乾葛煮飲亦得

欲使難醉醉則不損人方

搗栢子仁麻子仁各二合一服之乃以飲酒多二倍

又方葛花并小豆花子末為散服三二匕又時進葛根  
飲枇杷葉飲并以雜者乾蒲麻子等皆使飲而不病  
人胡麻亦熬酒先食鹽一匕後則飲酒亦倍

附方

外臺秘要治酒醉不醒

九月九日真菊花末飲服方寸匕

又方斷酒用驢駒衣燒灰酒服之

又方鸕鷀糞灰水服方寸匕



聖惠方治酒毒或醉昏悶煩渴要易醒方

取柑皮二兩焙乾為末以三錢匕水一中盞煎三五沸入鹽如茶法服妙

又方治酒醉不醒

用菰菜子二合細研井花水一盞調為二服

千金方斷酒法

以酒七升著瓶中朱砂半兩細研著酒中緊閉塞瓶口安猪圈中任猪搖動經七日頗飲之

又方正月一日酒五升淋碓頭杵下取飲

又方治酒病

豉葱白各半升水二升煮取一升頓服

肘後備急方卷七

欽定四庫全書

肘後備急方卷八

晉 葛洪 撰

治百病備急丸散膏諸要方第六十九

裴氏五毒神膏療中惡暴百病方

雄黃朱砂當歸椒各二兩烏頭一升以苦酒漬一宿猪脂五斤  
東面陳蘆煎五上五下絞去滓內雄黃朱砂末攪令相得畢諸  
卒百病溫酒服如棗核一枚不差更服得下即除四肢有病可

金匱要略卷八  
摩癰腫諸病瘡皆摩傳之夜行及病冒霧露皆以塗人身中佳  
效方并療時行瘟疫諸毒氣毒惡核金瘡等

蒼梧道士陳元膏療百病方

當歸天雄烏頭各三兩細辛芎藭朱砂各二兩乾薑  
附子雄黃各二兩半桂心白芷各一兩松脂八兩生  
地黃二斤搗絞取汁十三物別搗雄黃朱砂為末餘  
以釀苦酒三升合地黃漬藥一宿取豬脂八斤  
微火煎十五沸白芷黃為度絞去滓內雄黃朱砂末

攪令稠和密器貯之腹內病皆對火摩病上日兩三度從十日乃至二十日取病出差止四肢肥肉風瘴亦可酒溫服之如杏子大一枚

主心腹積聚四支痺癢舉體風殘百病效方華佗虎骨膏療百病

虎骨野葛各三兩附子十五枚重九兩椒三升杏仁巴豆去心皮芎藭切各一升甘草細辛各一兩雄黃二兩十物苦酒漬用時猪脂六斤微煎三上三下完

附子一枚視黃為度絞去滓乃內雄黃攪使稠和密  
器貯之百病皆摩傳上唯不得入眼若服之可如棗  
大內一合熱酒中須臾後拔白髮以傳處即生烏諸  
瘡毒風腫及馬鞍瘡等洗即差牛領亦然

莽草膏療諸賊風腫痺風入五臟恍惚方

莽草一斤烏頭附子躑躅各三兩四物切以水苦酒  
一升漬一宿猪脂四斤煎三上三下絞去滓向火以  
手摩病上三百度應手即差耳鼻病可以綿裹塞之

療諸疥癬雜瘡

隱居效驗方云并療手脚攣不得舉動及頭惡風背脇卒痛等

蛇銜膏療癰腫金瘡瘀血產後血積耳目諸病牛領馬鞍瘡

蛇銜大黃附子當歸芍藥細辛黃芩椒莽草獨活各一兩薤白十四莖十一物苦酒淹漬一宿猪脂三斤合煎於七星火上各沸絞去滓溫酒服如彈丸一枚

日再病在外摩傳之耳以綿裹塞之目病如黍米注  
皆中其色細黃一名細膏南人又用龍銜藤一兩合  
煎名為龍銜膏

神黃膏療諸惡瘡頭瘡百雜瘡方

黃連黃蘗附子雄黃水銀藜蘆各一兩胡粉二兩七  
物細篩以臘月猪脂一斤和藥調器中急密塞口蒸  
五斗米下熟出內水銀又研令調密藏之有諸瘡先  
以鹽湯洗乃傳上無不差者



隱居效驗方云此膏塗瘡一度即瘥時人為聖

青龍五生膏療天下雜瘡方

丹砂雄黃芫荽椒防已各五分龍膽梧桐皮栢皮青  
竹茹桑白皮蜂房蝟皮各四兩蛇蛻皮一具十三物  
切以苦酒浸半月微火煎少時乃內臘月猪脂三斤  
煎三上三下去滓以傅瘡上并服如棗核大神良

隱居效驗方云主癰疽痔惡瘡等

以前備急諸方故是要驗此來積用效者亦次于後云

扁鵲陷水丸療內脹病并蠱疰中惡等及蜂百毒溪毒  
射工

雄黃真丹砂別研礬石熬各一兩將生礬石三兩半  
燒之鬼臼一兩半蜈蚣一枚赤足者小炙斑猫去翅  
足龍膽附子炮各七枚藜蘆七分炙杏仁四十枚去  
尖皮熬搗篩蜜和搗千杵腹內脹病中惡邪氣飛尸  
遊走皆服二丸如小豆若積聚堅結服四丸取痢洩  
下蟲蛇五色若蟲疰病中惡邪飛尸遊走皆服二三

凡以二丸摩痛上若蛇蜂百病苦中溪毒射工其服者視強弱大小及病輕重加減服之

丹參膏療傷寒時行賊風惡氣

在外即支節麻痛喉咽痺寒入腹則心急脹滿胃脇痞塞內則服之外則摩之并癰緩不隨風濕痺不仁偏枯拘屈口喎耳聾齒痛頭風痺腫腦中風動且痛若癰結核漏瘰癧堅腫未潰傳之取消及丹癰諸腫無頭狀似骨疽者摩之令消及惡結核走身中者風

水遊腫亦摩之具服者如棗核大小兒以意減之日  
五服數用之悉效丹參蒟藿各三兩莽草葉躑躅花  
各一兩秦艽獨活烏頭川椒連翹桑白皮牛膝各二  
兩十二物以苦酒五升麻油七升煎令苦酒盡去滓  
用如前法亦用猪脂同煎之若是風寒冷毒可用酒  
服若毒熱病但單服牙齒痛單服之仍用綿裹嚼之  
比常用猪脂煎藥有小兒耳後癰子其堅如骨已經  
數月不盡以帛塗膏貼之二十日消盡神效無比此

方出小品

神明白膏療百病中風惡氣頭面諸病青盲風爛眥鼻  
耳聾寒齒痛癰腫疽痔金瘡癬疥悉主之

當歸細辛各三兩吳茱萸芎藭蜀椒木前胡白芷各  
一兩附子三十枚九物切煎猪脂十斤炭火煎一沸  
即下三上三下白芷黃膏成去滓密貯看病在內酒  
服如彈丸一枚日三在外皆摩傳之目病如黍米內  
兩眥中以目向天風可扇之瘡蟲齒亦得傳之耳內

底著亦療之緩風冷者宜用之

成膏

清麻油十三兩菜油亦得黃丹七兩二物鐵鎚文火煎麤濕柳批篋攪不停至色黑加武火仍以扇扇之攪不停烟斷絕盡看漸稠膏成煎須淨處勿令雞犬見齒瘡帖痔瘡服之

藥子一物方

婆羅門胡名船疎樹子國人名藥療病唯須細研勿

令麤皆取其中仁去皮用之

療諸疾病方

卒得吐瀉霍亂蟲毒臍下絞痛赤痢心腹脹滿宿食  
不消蛇螫毒入腹被毒箭入腹并服二枚取藥子中  
仁暖水二合研碎服之疽瘡附骨疽腫疔瘡癰腫此  
四病量瘡腫大小用藥子中仁暖水碎和猪膽封上  
癰腫冷遊腫癰瘡此五病用醋研封上蛇螫惡毛蝎  
蜈蚣等螫沙虱射工此六病用暖水研赤苋和封之

婦人難產後腹中絞痛及惡露不止痛中瘀血下此  
六病以一枚一杯酒研溫服之帶下暴下此二病以  
栗汁研溫服之齧蟲食齒細削內孔中立愈其擣末  
篩著瘡上甚生肌肉此法出支家大醫本方

服鹽方療暴得熱病頭痛目眩并卒心腹痛及欲霍亂  
痰飲宿食及氣滿喘息久下赤白及積聚吐逆之氣少  
力顏色痿黃瘡瘻諸風其服法

取上好鹽先以大豆許口中含勿咽須臾水當滿口



水近齒更用方寸匕抄鹽內口中與水一時咽不爾  
或令消盡喉若久病長服者至二三月每旦先服或  
吐或安係卒病可服三方寸匕取即吐痢不吐病痢  
更加服新患瘡者即差心腹痛及滿得吐下亦佳久  
病每上以心中熱為善三五日亦服佳加服取吐痢  
痢不損人久服大補奔豚腎氣五石無不差之病但  
恨人不服不能久取此療方不一小品云卒心痛鬼  
氣宿食不消霍亂氣滿中毒鹹作湯服一二升刺便

吐之良

葛氏常備藥

大黃桂心甘草乾薑黃連椒木吳茱萸熟艾雄黃犀  
角麝香菖蒲人參芍藥附子巴豆半夏麻黃柴胡杏  
仁葛根黃芩烏頭秦艽等此等藥並應各少許

以前諸藥固以大要嶺南使用仍開者今復疏之衆藥  
并成劑藥自常和合貯此之備最先於衣食耳

常山十四兩蜀漆石膏一斤阿膠七兩牡蠣朱砂大

青各七兩鼈三枚鯪鯉甲一斤烏賊魚骨馬藺子一  
大升蜀升麻十四兩檳榔五十枚龍骨赤石脂羚羊  
角三枚橘皮獨活其不注兩數者各四兩用芒硝一  
升良

成劑藥

金牙散玉壺黃丸三物備急藥紫雪丹參茵草膏玉  
黃丸度瘴散末散理中散痢藥疔腫藥其有側注者  
隨得一種為佳

老君神明白散

術附子炮各二兩烏頭炮桔梗二兩細辛一兩擣篩  
旦服五方寸匕若一家有藥則一里無病帶行者所  
遇病氣皆削若他人得病者溫酒服一方寸匕若已  
四五日者以散三七水三升煮二沸服一升取汗即  
愈

又常用辟病散

真珠桂肉各一分貝母三分杏仁二分熬雞子白熬

令黃黑三分五物搗篩歲旦服方寸匕若歲中多病  
可月月朔望服

單行方

南向社中栢東向枝取曝乾末服方寸匕姚云疾疫流  
行預備之名為栢枝散服神良刪煩方云旦南行見  
社中栢即便收取之

斷瘟病令不相染方

熬豉新米酒漬常服之

小品正朝屠蘇酒法令人不病瘟疫

大黃五分川椒五分朮桂各三分桔梗四分烏頭一  
分被襖二分七物細切以絹囊貯之十二月晦日正  
中時懸置井中至泥正曉拜慶前出之正旦取藥置  
酒中屠蘇飲之於東向藥置井中能迎歲可世無此  
病此華佗法武帝有方驗中從小至大少隨所堪一  
人飲一家無患飲藥三朝  
一方有防風一兩

姚大夫辟瘟病粉身方

芎藭白芷藁本三物等分下篩內粉中以塗粉於身  
大良

附方

張仲景三物備急方司空裴秀為散用療心腹諸疾卒  
暴百病

用大黃乾薑巴豆各一兩須精新好者搗篩蜜和更  
搗一千杵丸如小豆服三丸老小斟酌量之為散不及

丸也若中惡客忤心腹脹滿卒痛如錐刀刺痛氣急  
口噤停尸卒死者以煖水若酒服之若不下捧頭起  
灌令下喉須臾差未知更與三丸腹當鳴轉即吐下  
便愈若口已噤亦須折齒灌之藥入喉即瘥

崔氏海上方云威靈仙去衆風通十二經脈此藥朝服  
暮效疏宣五臟冷膿宿水變病微利不瀉人服此四  
肢輕健手足溫暖並得清涼時商州有人患重足不  
履地經十年不瘥忽遇新羅僧見云此疾有藥可理



遂入山求之遣服數日平復後留此藥名而去此藥  
治丈夫婦人中風不語手足不隨口眼喎斜筋骨節  
風胎風頭風暗風心風風狂人傷寒頭痛鼻清涕服  
經二度傷寒即止頭旋目眩白癰風極治大風皮膚  
風痒大毒熱毒風瘡深治勞疾連腰骨節風遶腕風  
言語澁滯痰積宣通五臟腹內宿滯心頭痰水膀胱  
宿膿口中涎水好喫茶漬手足頑痺冷熱氣壅腰膝  
疼痛久立不得浮氣瘴氣憎寒壯熱頭痛尤甚攻耳

成膿而聾又衝眼赤大小腸祕服此立通飲食即進  
黃疸黑疸面無顏色瘰癧遍項產後祕澁暨腰痛曾  
經損墜心痛注氣膈氣冷氣攻衝腎臟風壅腹吐脹  
滿頭面浮腫注毒脾肺氣痰熱欬嗽氣急坐卧不安  
疥癬等瘡婦人月水不來動經多日血氣衝心陰汗  
盜汗醵臭穢甚氣息不堪勤服威靈仙更用熱湯盡  
日頻洗朝塗若唾若治醵臭藥自塗身上內外塗之  
當得平愈孩子無辜令母含藥灌之痔疾祕澁氣痢

絞結並皆治之威靈仙一味洗焙為末以好酒和令微濕入在竹筒內牢塞口九蒸九曝如乾添酒重洒之以白蜜和為丸如桐子大每服二十至三十丸湯酒下

千金方當以五月五日午時附地刈取葉耳葉

洗曝燥搗下篩酒若漿水服方寸匕日三夜三散若吐逆可蜜和為丸準計一方匕數也風輕易治者日再服若身體有風處皆作粟肌出或如麻豆粒此為



白鮮皮黃芩鬱金各二大兩黃蘗馬牙硝各四大兩  
搗篩患相當及常要啖重者藥三大兩地黃半斤豉  
二合蔓菁油四合合齊前啖至晚飼大效豉葱薑各  
一兩水五升煮取半升和酒灌之即瘥

蟲頰十年者

醬清如膽者半合分兩度灌鼻每灌一兩日將息不  
得多多即損馬也

蟲頰重者

葶藶子一合熬令紫色搗如泥桑根白皮一大握大棗二十枚擘水二升煮藥取一升去滓入葶藶搗令調勻適寒溫灌口中隔一日又灌重者不過再瘥蟲頰馬鼻沫出梁腫起者不可治也

驢馬胞轉欲死

搗蒜內小便孔中深五寸立瘥又用小兒屎和水灌口立瘥

又方騎馬走上坂用木腹下來去擦以手內大便孔探却

糞大效探法剪却指甲以油塗手恐損破馬腸

脊瘡以黃丹傳之避風立瘡

疥以大豆熬焦和生麻油搗傳醋泔淨洗

目暈以霜後楮葉細末一日兩度管吹眼中即瘥

馬蛆蹄

槽下立處掘一尺埋雞子許大圓石子令常立上

馬遠行到歇處良久與空草熟刷刷罷飲飲竟當飼困

時與料必病及水穀

六畜瘡焦痂以麵膠封之即落

馬急黃黑汗

右割取上斷訖取陳久靴爪頭水漬汁灌口如不定  
用大黃當歸各一兩鹽半升以水三升煎取半升分  
兩度灌口如不定破尾尖鑱血出即止立效

馬起卧胞轉及腸結此方並主之

細辛防風芍藥各一兩以鹽一升水五升煮取二升  
半分為二度灌後灌前用芒硝鬱金寒水石大青各



一兩水五升煮取二升半以酒油各半升和攪分二度灌口中

馬羯骨脹

取四十九根羊蹄燒之熨骨上冷易之如無羊蹄楊柳枝指麤者炙熨之不論數

飲馬以寅午二時晚少飲之

啖鹽法

鹽須乾天須時七日大馬一啗一升小馬半升用長

柄杓子深內咽中令下肥而強水草也

治馬後冷

一兩日永差


啖大麻子

淨擇一升飼之治啞及毛焦大效

疥以樗根末和麻油塗先以皂莢或米泔淨洗之洗了塗令中間空少許放蟲出不得多塗恐瘡大

祕療疥以巴豆膩粉研麻油塗定洗之塗數日後看更

驗



肘後備急方卷八